


寧澹齋全集

文部四



寧澹齋全集卷之七目錄

行狀

嘉議大夫貴州按察司按察使白野陳公

行狀

中憲大夫河南按察司副使配吾王公行

狀

奉議大夫左春坊左庶子兼翰林院侍讀

馮孝子源明先生行狀

內鄉邑丞晴峰華公暨配喻孺人副室李

儒人行狀

勅封文林郎江西贛縣知縣叔氏觀山府

君行狀

勅封儒林郎翰林院修撰先考見洲府君

中行略

勅封安人先妣秦氏行述

傳

已侯策齋劉公名宦傳

南崖老人翁傳

醇懿先生虛溪姚公誄

寧澹齋全集卷之七

句章楊守勤克之甫著

行狀

嘉議大夫貴州按察司按察使白野陳公

行狀

余里居八載隨白野陳公杖履後一言一動稟
為法程今春將屆途北上值公養痾下捷不揖
客者已數月遂弗及奉顏色聆緒論以行悒快
者久之詎意居無何而以訃聞也天不憖遺奪

我黃髮悲哉至是公嗣子允揚等佯來持厥甥
趙明府昌期述公行事而丐余爲之狀嗚呼余
烏忍狀公公諱願正字觀甫世受陳姓別號白
野起家進士一再爲縣令稍遷大理平出守南
雄擢滇南臬副尋脩兵貴竹累功進叅知加按
察使致仕陳之先有幽遠者特以高義聞七傳
而爲存耕翁某某生尚書兵部郎蘄水簿公某
某生廣西叅政公懋義是爲公父娶桂太恭人
叅知公成進士之明年爲南水部龍江署中夢

神奉黃衣童授太恭人者詰旦公生而韶令七
歲就外傳強記日數百言學士姚明山公過訪
公出揖輒手摩其牙牌命念四子書皆成誦學
士竒之曰此千里駒也東峪王公就趙大司馬
相攸以女字公是爲王恭人每依叅知公官兩
粵歸老時公年十四偕同學從父憲副海渠公
補博士弟子員應巳酉鄉試以內艱歸與邑知
名士馮方伯葉明府王孝廉結社卒業辛酉偕
計上春官遂登進士第出知金壇縣縣多貴仕

能以其重撼令豪奴白晝攫金侵掠人土地公
首戢之犯卽傳泐毋少借而居身廉科歛平泐
橫役裁耗例恤註誤創豪喜訟者邑爲歌舞課
邑弟子拔其尤亟獎掖成就之如王公肯堂堯
封于公文熙明照潘公槐馮公體乾後先高第
去秩行滿忽流賊入邑亾所藏金民愛其父母
競輦輸如倪內史故事而邑貴人方側目公遂
中柱後惠文泐量移上蔡蔡俗務闢狼時鳴鏑
驟馬殺越人于貨公殲其魁嚴保甲申要束道

路以安溝鎮地多沃衍民假繕城埴爲名侵二
千畝許公廉得狀奪還官歲輸金以千計爲廟
祀牽餼屏屨資省縣官鉅萬遷大理評事先是
司封駁者慮持泐之不咸寧骯骯以徇公廩廩
三尺辟則辟衷則衷所不與泐比者駁亾數
今上初載江陵攝政務束濕多置私人金吾緹
騎間引繩批根獲妖人王之竒爲幻術貯水照
人種種傾都愚民妄立爵號誣服以不軌邀陞
賞首從八十餘人俱論立磔市公吁駭曰律稱

年洲初集 卷之七
不軌謂謀危社稷耳安一男子左道煽惑法當
死而若蚩蚩者何再四駁之少司寇執強無已
以白政府江陵雅知公峭直正色曰大理是評
駁之司部擬未當頻駁何嫌刑曹乃改之奇等
三人爲首坐死餘並從遣杖有差天下稱平歷
寺副正滿考遷南雄守雄固咽喉楚粵凌江上
游設權關前守多比胥作姦公力行清刷令輸
稅于府親爲衡較封題轉納公身益白所儲盛
戒備設保甲建麗譙分籌徹夜道不拾遺歲大

澇嚙民田數千百畝虧賦額甚公請以梁稅之
羨足之遠邇擊頽時大征羅旁徵募驛騷公虞
叢菁路襍氓越境罔知或投虎口藉盜糧上計
督府請改輸銀募近民遞運給軍汔恃以亾患
歲庚辰大弊群吏臺使者交章推轂 上錄公
卓異轉雲南按察司副使分巡安普署在會城
沐國之所彈治僕御闌出爲姦利亾誰何公正
身率屬一切以法繩之莫敢譁丁外艱去服闋
補貴州威清道兵備威清入滇孔道百粵西隣

茂篁縣棧間酋長多黠猾難治滇臺檄公協捕
叛酋繼榮公謀知榮與土舍隆串密乃飭師旅
授方畧令丁守備維文劉知州承範同土官隆
內外夾擊踣之俘送滇南督府舒公嗟異疏薦
有紆籌以平鄰寇而讓功不居語魯溝當滇粵
交粵酋岑氏世雄其地椎埋爲虐患苦商旅督
府蕭欲勦之公謂此夷獠故習可不煩兵而定
乃親行部遣檄宣諭 國威責以大義岑悟輒
縛戎首伏法剏兩營分兵防禦官爲權稅有掠

者械繫以聞其勝算多若此沙酋與斬酋構借
兵安國亨報聞洶洶公曰何事乃爾辦此只數
日事密遣灞陽鄒守脩安順楊知州發賈淑洞
夷兵遮殺捷聞兩院虞挑釁大駭公卽移文國
亨本官世受 國恩何至貸兵仇殺自扞文罔
此必種落納賄弄兵具以狀來安氏素驍勇爲
諸酋冠忽創官兵大慚省檄語開端委罪卽對
使頓顙謝而逮一二長官請命二酋聞之膽落
矣蓋公控制諸夷奉揚 皇靈寔身以羔羊五

純之節至鎮斥諸司餽遺安民奉八百金爲壽
公扶其使加誚讓焉迨然明之儔乎故寬之則
釐面承恩威之則弭耳伏罪安順本置軍衛已
改州因仍以武弁主 文廟祀州大夫從奉璋
爾公曰生平誦說謂何詎可覩顏韎韜後移文
學使者以州正主祀事得請于 朝而諸生駭
所不習會秋中行賀 萬壽禮未竣大譁公怒
移文學憲盡停諸生廩卽切責諸弁之鼓衆者
約束行戶一切以州大夫爲政乃大定滿考進

布政司叅政移守新鎮飭吏治緩征徭詰戎獄
益又精審所轄平越關箱道有腰創橫尸公大
索賊不得夢謁玄帝高真觀有訴寃人青衣而
藍其緣帝命四將押發公前覺而心動晨朝居
民徐文煜認尸其弟諸生文炤公爲鞠孤女云
父以喪母再聘同煜稱責于楊而煜以腹疾先
歸父遂遇賊因問服飾云何女對與夢協公大
驚異卽問煜治業云何有仇隙不女云伯以治
蓋爲生與父不相能日前爭產持刀相逐公瞿

然曰得之矣卽命尉取煜治蓋刀發麻哈州驗尸創大小與刃合一訊而服撻爨獄中衢路稱快公自庚辰迄辛卯十年宦蹟多在西南夜郎六詔之區戶有尸祝建牙授鉞物望咸歸而耿介自守卽同籍同里諸公若袁少傅輩或在政府或在銓臺未嘗以片楮相干至相望以久不聞問故聲績孔彰而仕宦不達如此播酋楊應龍兵起兩臺欲投重于公而因王恭人嬰疾得齋捧歸御史大夫摘公避咎論調明年大計吏

部疏公才守優年力邁進官總憲特予致仕公時財六十有二耳歸而琴鶴蕭然檢橐裝不能構廳事九載僅完一堂會王恭人病歿遂授諸子家乘而爲采真遊先是喪叅知公謹矜襄事卜地姜湖之濱獅山之麓斥墓田治菴舍計爲可久懸車後卜兆先塋左度庵而北嵌崑小築數楹而軒其右引水疊石莧果蒔花偕仲氏宗戚諸老暨方外名德游息其中皇覽之辰每念劬勞不欲爲樂先期入山浹旬乃返居里黨恂

年游齊全集 卷之七
七
恂雅不以先輩自處後生有所造請倒屣迎門
僂僂循牆耄期因勸生平寡嗜慾食飲不過卮
酒豆肉而速客備極鮮腆或遇酒人嚴觴政馱
馱夜判不休家食二十年領喪諸簪紱而恥爲
周容長吏有苛政父老聚族來請趣駕往面正
其過所居無負郭田無鮮衣僕而嚴戢子姓毋
爲人居間雖驚害者不能伺公郤而中之其自
贊云無它腸無逆履服官三十年不知有身居
鄉二十載未嘗有已載籍墳典供吾求青山白

雲爲吾侶其清漂亮節直道坦衷具可想見殆
尚古之遺哉他若葺家廟增祀田贖還董舉祖
隴可謂善繼夢憲副公乘大編示一卷曰千里
風颿一鏡懸碧山風物尚依然公應聲曰鳴雀
已看相唱和江天還復起飛鳶固公之精神所
通亦徵後人鵲起矣公曷少餐老來稍進魚肉
病瘖後加七箸而不知大期至矣甲寅二月中
夢遊仙林老人相送至百歲橋而別覺猶聞蘭
蒨香翌日劉憲副念庭公來命治具娓娓談說

生平已令孫魯羅拜一若訣別者月晦召諸子
孫鱗立撫膺笑曰誰似我兒孫滿前者亦復何
恨遂不語不食浹旬而逝時維甲寅三月九日
距生嘉靖辛卯五月廿二日得壽八十四恭人
王先公十六年卒別有誌生子四允暘允玉諸
生允相諸生允斗女一適比部郎馮公若舒孫
男十承恩承德承爵諸生承胤承宣承休承祚
承祐承禎孫女一曾孫四曾孫女一婚嫁聘字
具詳述中暘等將以冬杪合葬公于獅山之原

乞鉅公爲志壙石而余狀之如右太史氏曰余
讀海洲陳先生誌傳益勛業爛然藩臬間矣及
閱羅念菴論著沈叅戎柳慶事其計撫劉盧二
酋策誠竒顧念非先生不足辦此先生受計叅
戎率數老弱直入虜營開使悔罪二酋踴躍受
命不煩一矢遂安武緣向微先生縱叅戎善策
虜誰爲射聊城者柳慶且多事矣試以校白野
公始檄岑氏旣感安奴省國家軍興凡幾前後
若合符節豈不偉哉然先生竟爲忌者所掩而

公亦絕口不言功不矜不伐固其家法歟至若
勇退急流養高洛社閨門著雍睦之風燕居無
媿褻之色嚙齒不言人過而吹揚小善維恐不
及其於表正閭里洵仲弓之於元方也故嘗綜
公生平論之承家則孝子服官則貞臣居鄉則
長者子姓烝烝具若于庭訓則有先之者矣不
腆脩詞容或挂漏唯立言君子采擇之

中憲大夫河南按察司副使配吾王公行

狀

蓋余嚮慕臨邑憲副配吾王公而不及見其人
公第吏部君與余同舉進士每娓娓述公治行
余竊心儀之及道其考終時有懷瞻怙痛隕不
自勝竟成歿孝爲歛歔哀其志至是復持所爲
行畧謁余狀以介乞銘垂不朽謹詮次如左惟
名公采擇焉公諱浩字克伯別號配吾居臨邑
以學博士累封中憲大夫今祀鄉賢諱三遷翁
之伯子也其先勝國時名盛者以武功顯爲十
道馬步督八傳自萊陽徙臨又三傳爲倫倫生

世禮皆隱君子世禮生貸績學餼于庠爲公大
父不幸蚤世大母劉苦節四十餘年公隨封翁
後事大母甚謹幼穎敏過人六七歲時封翁方
受徒講易執問環立辨析無隱公侍聽輒了大
義一似天啟以是鍾封公心出輒携之一日道
經陽丘以裋褐戲懸壁間夜不及收居停主晨
起驚曰儼夢中金帶也子必顯居恒讀書喜瞑
坐忽楹宇晝傾封翁倉皇覓所在則兀然息樹
下不爲動竟莫識所從出蓋有呵護者云贈恭

人母于疾革密爲文禱城隍廟祝逆謂公欲裁
而算益而母乎神已語我於夢數定矣勉旃善
自愛其誠動鬼神類若此舞勺試有司下筆作
驚人語時髦爲避舍及補弟子員學日富試必
壓卷逾冠上辛卯鄉薦乙未登進士第視政禮
部奉告歸里出必徒行如諸生時邑大夫致騶
從卻不受禮爲人子三賜不及車馬公其用是
道與歲丁酉授戶部陝西司主事故事司徒郎
不事事者使管壩倉倉出入要會無闕盈詘官

吏取其員耳才若公而司若事或爲公少之公曰壩卽不能佐度支一籌安見涓流蟻垤無裨滇岱也而屑越視乎務濟策釐剔至今著爲令歲餘督餉易州易無土著市井鱗次皆從外徙似爲亾叛淵藪帶甲二十萬其資糧少殺於巖塞給恒後期且不及格及入又不足奉豪家子毋息行伍多譁公調停振發以均以期且時庭召而慰撫之士懽忭若宿飽乃條上便宜八事曰核尺籍之假冒嚴債帥之剥脂澄操演之賞格畫秋班之糧額酌民屯之兌支衡收糴之規例經兩運之循環弛米商之苛禁種種當上意見施行署部少司農楊公語諸大夫曰王君真社稷材也已亥晉本司員外郎明年晉河南司郎中又明年以覃恩詔實授加封封翁如公官會差滿考稱職回領司篆得偵猾胥十二人置之法衙蠹爲股弁奉約束中官銜命挾索額外金寶十數萬莫能制公毅然曰錙銖皆軍國需守藏吏罔敢私方今宣大脫巾已事凜

凜萬一島夷鳥獸伏者貽我啓疆憂奚堪此尾
閭洩乎貴人還奏上知王郎中不可事亦寢
壬寅補潞安知府至則和易率真可親而不可
犯其治一取綏百姓自御惟一弋緝衾裯敝不
時更也約已率屬罔片紙抵牾抽間吏苟廉卽
戇忤必容之或稍以賄敗斥去不少貸尚衣中
謁者悉索幣賦徃徃以愆期不中程激日上怒
寔濟其婪重者逮詔獄否亦鑄級自是剝削不
遺尺幅繅人多竄匿公爲寬其直假以時監工
日號度絜以手謁者無所容窺伺藩祿苦不
支逋且十餘歲公惻然閱之嚴懲惰窳吏下令
屬邑毋得迂緩視不率間署下考隣封則以手
札婉促之及格乃已有麗大辟者爰書已具忽
心動輒疑之首揭告直指開其寃時吏部君適
在邸以自爲出入詰公公曰幾爲令招所誤幸
得平反敢以人命護我短耶先師廟將圯且址
迂直於形家不利公撤新之崇軒翼翼煥然改
觀群八封之士月有試親第甲乙示知嚮徃人

文蹶起幾半賢書守潞四載禱雨雨應禱晴晴
應及入覲士民遮道扳留車爲軹父老千餘作
兒啼追送百里外公亦褰帷雪涕不忍去蓋公
敬信節愛靖共正直悉虛中而時出之是以天
人嚮荅上下孚獲則誠一之致也丁未擢河南
按察司副使備兵磁州公清明播人耳目不免
爲溪刻者所忌先公代庖者事多不便民道役
百餘至枵腹而服于官公手批訴牘立復其糈
雖受憾勿恤是歲冬封翁訃倏至卽日就道躡

踊哀慟絕而復甦三年足不踰閭偕弟輩日三
上食撫膺號泣至繼以血爰以寒月居苦塊得
疾旣襄大事遽不起公天性和易與人無疾言
遽色而識力凝定處則萬夫不奪事封翁色養
篤摯甘脆務極水陸卽厠踰敞非手澣綴不以
上遇少疾痛藥餌必親嘗乃進晝屏客侍不離
頃刻夜視唾息至漏不一解衣舄在官數月不
膝下輒孺子泣眠食爲損至表劉大母節請于
朝有詔旌其門事繼母封恭人馮如其贈母

于皆純孝不易及業以脩之家者揚于天子之庭海內仰公風裁駸駸嚮用未已而卒以封翁背棄弗及視含殮不能遣之于懷遂從游於泉下傷哉然公寔有弟吏部君爲生孝而以子昌祚付託之令課督繼志以究未盡之業公雖歿猶生矣公卒萬曆壬子年十月初九日距生嘉靖甲子年二月廿三日享年四十有九擇今乙卯年十一月十二日同元配贈恭人藺繼配封恭人劉祔葬于封中憲翁墓側子一卽昌祚

劉恭人出余不文無能狀公感公孝不忍辭至倬颺休懿與雲漢並垂則有操椽筆者在

奉議大夫左春坊左庶子兼翰林院侍讀

馮孝子源明先生行狀

源明馮先生出入石渠天祿凡二十餘載以久侍講讀爲皇太子所敬禮蓋卷阿之頌引翼必先孝德而東萊氏謂人主常與慈祥篤實之士處所以興起善心培養德性有不在言語之間者先生固篤孝君子其見重有以也自春

宮輟講而後先生亦引疾侍太夫人養承懽貞
壽備極深摯益隱然係朝野之望乃太夫人
棄栢棬甫闋暮而先生以哀毀殞矣悲夫至是
次君爾攸將丐名公志其墓而持行畧泣請余
狀余與先生姻且屬後進稔先生孝行最悉卽
不文烏敢辭按先生諱有經字正子因母孕時
夢一老授以童孩口稱此正人爲節婦子蓋爲
公貴徵而又爲封太宜人冰蘖兆矣系出四明
故號源明云馮爲明慈鉅宗纓紱如織永樂間

唐禮部尙書叔和之後給事公吉亨者徙居顏
澍四傳至時桂克彰世德嘗賓鄉飲生東明公
讚中嘉靖甲子順天榜累贈至論德是爲先生
父先是東明公之京求錦衣籍得廩都庠銳意
追先進之軌時吾慈顏侍御冲宇公方爲大行
從之講明性道初贅沈氏蚤世今贈宜人繼劉
累贈太宜人實生先生生甫週贈公偶展易輒
能指易作啣晤狀公卽以易占之吉上林劉君
稱公內兄喜談星曆時言甥當賢且貴慮其蚤

孤五歲果失怙先生環尸晝夜悲號見太互人痛絕仆地疾呼外大母球甦然後敢哭若是數四一藐孤克從苴墨吊者異之明年就傅卽上林君以舅爲師稍寬檢押然未嘗嬉戲開卷篤好一日忽似有物玩弄袖中者上林以爲戲索之則私創制義也三年上林避席去且使贊葉師與少宰韓敬堂公子共事韓見公應對敏捷顧其子曰此非而友而師也每有上賜嘗啖公公受而不食必以餉太互人其穎考叔之孝

乎癸酉商學使燕洋公大爲賞識采芹順天庠師竒先生特試以幼而無父題公得題念其先人蘇蘇隕泣文成庠師歎美之贈以貲鏹太互人性方嚴無纖鉅一以規範操之若虞銜勒之泛是以先生師事太互人羨墻見之矣於時前輩葵陽黃公養醇朱公今輔臣中涵方公數先生俱後先成忘年交其與諸友訂會文之約各爲饋饌先生馱念太互人徹午夜以佑讀寸管尺幅動出針鋒不忍以具膳煩母慈携盂粥以

給永日不言餒人稱先生念熊丸并忘食斷齏
矣甫冠抗顏爲人師多士景附適有尊人當路
者願爲啟居間之竇以代三釜先生正色拒之
館穀入悉奉爲養至購書無貲假得善本必焚
膏手錄以是日新富有名益起雖同學少年並
聯第入詞林而獨困逢掖乎初無愠色徐曰父
業未竟母節未彰孤之咎也李翁守槐雅器之
因以女女焉李宜人善事姑得其驩故公得一
志理業應余某公聘至霸上作焚舟計乙酉中

順天式同榜詩暨浙榜燧元學皆同宗而公獨
少人艷其家學云己丑成進士出南充陳某公
之門讀中秘書卽師韓少宰良邁也辛卯授編
脩教內書堂徃中貴有以精鏐輪奐之美爲餌
者先生長慮屏遠之記注起居同修國史
實錄一軌于信曰是烏可以欺天下萬世也天
下萬世不可欺可欺吾心乎癸巳得請奉母歸
慈上曾王父墓至丹陽李宜人逝先生哭之哀
又念太孀人失侍徬徨累月媒妁以蓼莪至情

欲爲締姻四明大老閉目謝去竟續陸文學懷
渠君女性閑靜潔滄澹且能均愛勞太宐人色
喜甲午還都尋以編脩初考取次封陸孺人乙
未分校春闈得雋張其廉輩二十五人丁酉主
湖廣試戀戀膝下強之而後可廼身發而心縈
之夢爲呻嚶入棘多方矢公簡士得解首熊公
廷弼于遺卷中楚材旣呈請揚太宐人節 詔
建棹楔表厥宅里之東剡祠坊內聯有式昭親
節思報 皇恩之句觀者知其忠孝矣戊戌轉

右春坊右中允庚子充 東宮講讀舊制講官
進拜 皇太子爲起一日偶不爲禮公直奏之
皇太子納焉每值講期間馮先生及給假南
旋又詢其至期銓部因檄使就道時葬事方竣
哀瘡甚沿途具疏請畢三年喪 上不允壬寅
就列初先生之給假扶觀也贈公歿已三十餘
年朽不勝緇於是更木新衣起視公如生額猶
汗液也先生一慟而仆血漬其面及至慈哀經
治葬號躡如初喪酸風動梓里太宐人每歎贈

公無肖像先生入仕輒覓善工一圖而清姿儼然親炙顏面于樞樞之間果與像類真哀慕之感哉昔初假喪李宜人已再假又喪陸孺人于彭城因聘劉宜人爲繼室定省中饋猶忘其爲亾李與陸也癸卯陞諭德乙巳轉左掌司經局事丙午七月壬試應天副欲擇吉先生曰王事也兼程而進疽發于背力疾抵龍江忍楚入闈矢公如丁酉而知名之士倍之至今兩榜士臚傳建禮大物鼎來皆公所造也丁未轉左庶子兼侍讀是秋率子婦上太宜人六十壽羅膝舞珽懽然樂也第隱隱歛歔爲不及贈公爾時先生需次當典武試力辭之戊申推國子祭酒又擬禮部侍郎皆不得中吉會有煩言波及公乃請告䟽凡三十上吉未得俞於是幡然掛冠矣顧先生逡巡坊局十有三年歷右而左又右而後左拾級以望庭署此實吾明大老避嫌并脩卻故而先生處之怡然等功名於泡影橫逆聽之至謂處世可有可無毋爲營塹此有

契于道者嘗咲指仲君曰吾以効職成母之榮
今得竟養食君之賜此足以當三公不與易矣
時太宐人尚無恙春明景淑奉板輿之郊外觀
山水園林之勝策蹇以從下車而徒必前後扶
掖之良朋高會必請命然後赴筵有竒卉時菜
必百方歸之持奏坐前會不遺一人語不隱一
字常自歎昔爲諸生則肄習居外在仕版則官
守羈身出告反面爲時幾何茲喜專侍慈顏視
膳寢無逸畧矣不問不對不命不退暇則談說

今昔時一解頤色稍變長跪而請漸溫乃起太
宐人稍有不安卽嘗藥進糜帶不能解貌爲瘁
焉旣復常乃復常幼而艾無改也所愛愛之所
敬敬之三屬之養者送者居且行者施與悉以
太宐人爲隆殺以是親疏無失所至於存孤如
張無隅之善後恤寡如五老媪之有終容人如
乘變取物之不追解謗如橫璫誣譖之不行皆
用德不報者常分甘旨之貳遺上林公爲畢婚
嫁隆棟宇營宅兆以推母愛於贈公知厚款遇

有差至不忍伐一木殘一蟻藹藹視執塗不異胞與絕不作僮父面徵孝愛之推也性不好翹人過亦不屑爲人隱干以非義者不難直斥之鄉人視爲月旦庚戌旣感疾辛亥長子歿焉壬子介婦又歿焉甲寅春太宜人亦見背矣公哽咽不出聲辰巳欲絕亭午始甦扶病號哭拜起如禮水漿三日不入口至小祥孺慕之悲猶昔也昧爽躬奉食飲事之如存已而劉宜人以哀苦積勞并憂先生病劇遽先朝露先生以太宜人極猶在堂乃奉安人視權厝郊園事未及竣而先生逝矣時乙卯九月十四日之午也余以前一日過問猶見督家詳密至誦菜根滋味清白久長語及太宜人淚下不輟逝之晨猶思理南裝爲太宜人合壙蓋居恒道太公五世邁葵于周爲不怠本此治命也不移時遂爾易篋嗚呼先生自適楚歸慈及之畱都瀕危者屢矣皆以憶太宜人故而茲竟以痛慕相從九泉也蓋生歿窮達有懷二人至五十而慕而思斯永矣

可不謂之篤孝君子乎昔吳虞翻稱董孝子盡
心色養喪致其哀都人謂先生足以當之余獨
有感于黃子之傳曰以慈名溪以溪名邑惟是
叔達之故倘異日有定論不以先生增重四明
乎先生生嘉靖丙寅閏十月十六日享年五十
配李繼陸贈封前載矣再繼者卽太宐人弟次
宇公女劉爲吾慈甲第詳贈公誌子三長爾偃
側室王氏出李宐人愛而乳之克順天府庠生
娶封給事中養冲呂公女繼工部員外在川周

公女次爾攸李出太宐人謂李有子此乳偃之
報幼名曰賢順天府庠增廣生娶大名知府巍
岡羅公女繼庠生懷一陳公女爾條劉出尚幼
女五長吳適不佞長子一琦邑庠生次晉適成
都知府夢韓張公孫景辰大學生次允適雲南
布政使文海袁公子弨杰邑庠生次泰次復俱
幼未字孫女壽偃出亦未字守勤曰古人有言
長筭詘于短馭豈不悲哉以公之材旣以乘風
雲之會際日月之光矣展所宏施社稷是庇而

竟不得爰立之命且今聖天子特俞禮臣之請復啟承華之幄慎簡一時孝德之士俾司輔導余以眇聞寡道術濫竽斯選方仰先生爲型模而先生不可作矣豈天未欲使贈公之業盡寃于先生而畱有餘以待後之人俾孝子之下復有孝子耶何奪之速也其行誼不及更僕數聊爲拮據其大都以俟秉筆者之採擇焉若曰以戚故爲諛墓地則余豈敢

內鄉邑丞晴峰華公暨配喻孺人副室李

孺人行狀

水部華君吾明醇篤君子也而遇事敏練有執持大司空倚君幹濟諸曹務甚切無何遽以母艱去則走余頓頽手行述一編泣曰顏不孝摧慘殊痛靡所逃貫唯是先君子垂七十而舉不孝九十三而終母喻孺人稱偕老顧不獲享不孝一日祿養而幸及養生母李孺人癸丑秋不孝且逮選以急欲迎母歸歸踰年始攀輿入邸舍乃未兩暮復奪之矣嗟嗟顏不克蚤奮以娛

二人又弗獲久待所生而華翟之或被昊天罔
極曷維其已儻微名鉅椽筆銘諸幽石庶藉不
朽惟先生爲我圖之以備采擇余習水部君最
深奚忍辭按公諱傑別號晴峰先世由無錫徙
明州家于定海之施公山數傳有成七處士者
無嗣嗣兄子鈺號逸菴是爲公考逸菴以祖居
湫隘跳處河東顧不善治生家益落生二子長
曰豪次卽公公幼善讀書苦貧甚徃徃減膳易
膏以繼夜兄豪亦不善治生嫂持家聞公呶唔

聲輒從旁譙讓公雖內自刻勵然敬事兄嫂不
敢一出口適有公牒考清吏公念矻矻章句將
如二親朝夕何不若俛就小道慨然赴縣試得
冠其儕年纔十五耳不藉寸貲母戴至裂布被
手縫襦褲贈公行抱牘上藩司主者奇公貌試
文墨更精准入爲椽益曉暢律例踰年進御史
臺椽隨行按部遇罪狀可矜疑者力爲陳請多
得昭雪人謂公施德于所不知後必食報云會
聞逸菴公病劇亟詣公府請假不許請罰而行

寧海府志卷之七
又不許公大號泣藩伯怒叱杖公公扳案不放
案爲移數步藩公益震怒左右惶恐公抗言曰
爲人不拔父死不可爲人安用爲吏願罰吏爲
人胡不可伯爲感動勅公歸得與父永訣受治
命旣服闋奉母戴之屨時艤舟西湖以娛母翁
有遺產質子錢家者悉如命贖歸然皆推與兄
豪不以嫂故宿餘憾其孝友類若此嘗爲山東
撫臺掾值紅羅女亂軍書劾午中丞何公鰲用
公籌畫靖東土而忌者掩何功至坐罪逮獄公

爲遍投揭白功狀卒得復官聞者莫不賢智公
滿考入部試中正八品格以冠帶省祭值倭犯
海上焚掠廬舍公潛募人伏宅傍叢冢中火起
輒撲滅之以故逸菴公所築河東宅獨無恙公
復念倭縱慄悍何令肆虐至此盡捐貲募里中
健兒晝揚旌旗夜燔柴擊銅器爲聲勢倭不敢
逼施公山多全活旋追奔斬一人生擒二人上
功幕府例得加爵爲府佐公曰吾有吾職寧受
賞金勞諸健兒可也比謁選得河南內鄉丞時

中丞何已遷大司寇預書稱公才行於當路者當路信任公如今偶令缺屬署篆公益勵冰蘖力行惠政以歲歉條上寬征法當路榜示隣邑悉如內鄉例仁聲幾遍中州矣居歲餘以勘鉛銅中毒氣瘋僵者七日夜良醫莫能治有神巫降誥曰此庶吏胡可不拔吾白之城隍得請於帝矣時皆以爲荒唐語翼日一老人持藥屑來視疾謂投蘿腹汁入口中病可甦少頃公喉間汨汨動亟尋老人倏不見再投之立起先是公寢疾已三月凡三上致仕牒當事審知公良循無他故特憐許之牒下而公竟起又重憐之然勢不可留復命視事兩月邑人念公不能具行李至有捐廬舍遮留者公眷先人丘隴卒垂橐歸歸而喻李二孺人並操作佐公家稍稍充歲時以詩酒自娛賑貧恤孤族多雅化教諸子一稟成孳足跡不入城市間一謁邑令爲陳鄉曲利病令式公隱德欲延置飲賓公曰吾非國老也奈何以一吏辱大典竟謝弗就公致政歸凡

四十餘年至九十三步履不殊少壯其年九日
携榼招賓率子弟登高賦詩周遊田野曰吾從
此與世辭矣次日奄然而化無一語及家事不
數月喻孺人亦化喻少公六歲其先杭產也當
公爲椽時有隣女目挑公公曰德莫敗於亂處
女吾方圖功名敢犯造物所惡輒却之又嘗寓
親舍親某願以女字公女乘巷遇忽滅火欲昵
公公念生平操行豈爲一時情構所毀推女子
於地而去未幾有日者推公行藏謂當官八品

因具稱喻女賢宜伉儷遂委禽焉孺人歸而身
親滌滌潔治蘋藻上事尊章下順君子一如女
誠公自椽迄入官鮮內顧孺人之力居多蓋公
不因冥冥墮節而天以良配佐之非偶然也孺
人舉二子皆多病廼爲公娶內鄉李女以自副
李產二子撫之如已出愷煦之象盎溢庭除卒
與公齊眉壽識者謂二老維德偕行固宜偕生
偕死不虛耳李孺人性簡質不愛綺飾事公與
喻孺人極恭謹言笑不輕發力勤織紉佐水部

君兄弟讀師友過從無不極豐款顧其督課過
於嚴君每日爾視乃翁垂垂白其能久待子成
名尚泄泄耶及水部君登第毋猶不離紡磚獻
鮮衣爲壽間一曳卽藏笥中若不忍晴峯公與
喻孺人之先背而瘠其餽也然而天之報李母
則不可謂不全矣公所著有古今言行錄若干
卷尤長於詩在齊有千駟群空荒塚在三歸人
去霸圖閒之句爲何中丞所賞家居惟以詩自
適有施山唱和集行世公卒某年月日距生某

年月日享年九十三喻孺人卒某年月日距生
某年月日享年八十七李孺人卒某年月日距
生某年月日享年七十五子四長立次位皆喻
出次彥又次卽顏癸丑進士工部屯田司主事
皆李出女一適費氏喻出孫男五孫女一曾孫
六具詳水部君行述中史臣曰晴峯公嘗語水
部君曩日者謂吾功名不顯獨壽過曆意不犯
二女所致良然攷公積行絜絜皆足上契天心
克昌厥後而出處矯然遠邁夷等非強學有志

節者能之哉兩安人如兄如弟令德壽豈抑亦
刑于者素矣今水部君駸駸嚮用流鴻樹駿光
於史乘揆厥所本安在名不顯也彼日家算數
及身而已烏知公之貽穀若是哉余不敏無能
闡潛德思傷孝子之志姑詮次以俟立言君子

勅封文林郎江西贛縣知縣叔氏覲山府

君行狀

封文林覲山公於勤爲諸父行而年弟伯晉父
也公少先君十歲同講道慈湖伯晉又與余同

丁酉舉兩家友最善暨先君捐館亦十載公以
伯晉贛縣考愛今封余濫竽橐筆方爲視草
而倏奉公諱感傷涕泗莫知所云適伯晉伴來
屬余狀何敢辭按公諱文耿字純叔別號覲山
余族出華陰隋驃騎後三傳唐工部尚書廣遷
浙睦州廣長子實仕吳越左相國始徙慈歷宋
元迨國朝逝傳至公大父質齋公有耆德生
二子長午岡櫛次慶山積二公才名相亞午岡
既登鄉書爲息令而慶山數竒弗售謝去增生

以侍養老所舉四丈夫子皆文學世其家伯曰
燮仲曰煒叔為公季曰恢一門孝友雍如也公
自幼穎特燥髮即博古文詞總角遊邑庠試輒
高等屢上有司不利適緯川馮先生發明良知
之旨於慈湖與先君往從遊聞道獨蚤故為文
根極道奧一時名詰咸心折之而尤以夸節懿
行自砥勵初娶馮孺人為侍御東厓公季女承
歡聚順維德之行孺人無祿早世公方盛年誼
絕再娶念兩尊人俱耄昆弟戮力進取罔侍所

夕懇求終養一如慶山於質齋公故事時伯晉
兄弟青年鵲起公親課讀尊人前以為娛及兩
尊人以壽終而伯晉舉於鄉第亦蜚英有聲無
非公教也公藉世業家頗饒後日益落嘗筆耕
構李為澹蒼沈公玉臺沈君諸公所傾慕然論
文譚道外絕不涉聲利事人益重之伯晉既累
下第受章貢令官舍獨居特迎公就養公偕季
往相與訪濂溪之流風吊東坡之遺跡及採文
成緒餘於虔南怡愉雅愛相得甚歡每伯晉退

食勉以清勤鎮靜無愧先民未幾首丘動念扁
舟返越不以一錢一縑自携仍塊處容膝吟諷
其中興至則窮幽攬勝屐齒幾徧即景舒嘯恣
意所適著有逍遙諸篇薜蘿諸集皆極天然自
得之趣晚取無用爲用之義更號一樗散人蓋
其所自托也至是伯晉三年績最 天子嘉所
自出予之封封章甫下偶感微疴溘焉朝露矣
憶昔先君受命之日亦先期長逝若同一揆豈
不悲哉公天性超曠亦復狷潔外若徜徉自適

然事關名節凜乎自持當伯晉兄弟藐孤時
覓澣婦於姚江詢知有夫若子立遣歸弗責其
償後其人以他事逮官語稍相連其人毅然曰
楊公市義若馮君者何敢累訊者嘆服居恒恪
守先世醇謹每事不欲上人卽有非意相干循
墻引避俟其自平人亦終歸冰釋邑大夫屢欲
憲乞逡巡遜讓且謂大父及父皆以期頤謝賓
飲竟弗赴益公念念事事不忘繼述其姒節懿
行類若此此足槩公生平矣先是公垂髫遇一

癯仙告以行藏期與後會有白雲縹渺歸洞天
八九之年此時見等語及歸自贛道經鐵柱宮
有邀入古剎者即曩所遇仙也仰視額中詩悉
如前語回顧其人忽不見公驚異亟歸抵家閱
兩歲而卒爲萬曆丁巳十二月二十八日距生
嘉靖甲辰十二月十八日享年七十有四配即
馮贈孺人另有志子二長汝昇即伯晉以贛令
陞廣東崖州知州娶文學馮公女繼羅江錢公
女一以贈一以封並稱孺人次女勉邑庠生娶

孝門董女孫男八昇出者台徵邑庠生台胤台
嗣台光台衡勉出者台兆台允台繩孫女三曾
孫男女各二婚嫁聘字具行畧中伯晉以戊午
四月十五日葬公於祖山沈家畧遵遺命也守
勤曰公嘗謂觀人先源委次交遊而卜以出處
斯稱完人故拮據王無功顛末補爲全傳係以
論讚謂其漸染庭闈之教行藏取舍間澹素曠
達絕類陶若乃遜宦辭名窮居寡與結同心於
異代聯合調於殊方自稱隱樂不虛也而世多

以酒病先生夫先生直淵明之不仕寓意於酒耳豈真酒狂者哉公晚年詩酒自娛亦大類陶斯言良以自寓也然公又嘗取先方伯行事與范文正一一比類而惜其用不大究咨嗟嘆息三致意焉則於世又未憇然也有子顯休以竟憂樂之志而公其不亡矣余也鄙不能殫述公懿行姑就伯晉行畧叅以平日所覩記爲之狀以俟秉筆者采擇焉惟名公之所命之

勅封儒林郎翰林院脩撰先考見洲府君

行畧

嗚呼痛哉先君之逝也不孝勤方邀一命之榮且擬冊封差便馳報膝下而王事未將計音倏至殞絕數四竟何及矣自惟存不能養歿不與含安用生爲而繫有母在未敢死匍匐歸則孤櫬在堂影響俱杳終天之恨曷其有極已乃藉先祖詒謀不煩累土僅告襄事塊伏墓左圖所以不朽先君而無從也因念先君好脩篤行闡翼聖真生平動稟禮法不踰規矩以期紹

年譜卷之七
儒先之懿範而弗克撫拾其實乞大人君子一言以耀泉壤罪且滋甚然每一搦管寸腸千割淚不可收旋就中輟者屢矣居諸奄忽遂踰小祥竊恐令名終湮忘親奚贖謹忍痛收淚厓畧詮次如左非曰敢爲諛墓云爾先君諱世思字汝位初號觀良後更號見洲楊氏出華陰自隋驃騎將軍諱恂者三傳至廣仕唐爲右武衛將軍封上蔡開國男贈工部尚書上柱國始遷浙之睦州廣八子俱爲節度刺史等官長巖仕吳

越至左相國生子實乃遷慈谿歷傳至宋有大隱先生名適者仁宗屢徵不起命旌其里入國朝族屬蕃衍世有潛德至贈驗封石田公諱祿績學繁善益昌大而光昭之石田公生二子長爲柳塘公諱子噐登成化丁未進士尹崑山高平常熟召入吏部累官河南左布政次爲醫訓科柳洲公諱子用柳塘公歿歷中外所至以清白著而委家務柳洲公公事毋張極孝事長兄惟謹柳洲公亦生二子長曰小洲公諱孫仲

舉嘉靖壬午科爲儀真今清介有伯父風是爲
先君皇考次諱孫瑞無祿蚤世先祖年四十艱
子謀置貳焉筮得艮象辭占者曰無庸嫡必有
子子且賢越數歲祖母葛果舉先君以故命名
及字咸取諸艮云先君生而瘠祖父母甚憂之
然神骨竦峻膚理清絕識者知非凡兒年三歲
隨任真州比先祖掛冠歸甫七齡即能應對賓
客無失容出就外傳聲朗朗出金石進止居處
各有常度初屬文輒援筆立就觀察養虛馮公

見一噐重遂爲忘年交歲壬寅先祖復側舉叔氏
世愚將嗣叔祖考先君友愛真切不啻同母弟
先祖偕中都守覺齋劉公吏部閑山陳公刑部
龍臯葉公中丞楓岡徐公爲耆英社必挈與俱
諸公皆肅然禮貌之中丞嶼湖秦公因字爲孫
壻巴酉外大父震湖秦公方以任子錄事詹事
府迺往行親迎禮庚戌還自京一以蘋藻中饋
絲麻委積事任家慈而身下帷發憤益專精舉
子業歷師虛溪姚先生鄮溪劉先生養素張先

生皆一時名儒無不悉其淵源故爲文必涵濡
理趣步驟先輩不作綺麗語尚鞏慨者稍或絀
焉丙辰倭突至舉邑駭走先祖獨潛匿翁舍出
入烈焰中不肯避先君親扶祖母携庶弟及諸
甥屬輩藏山谷間路失弟甥所在舉家號哭不
止詰旦冒險出訪先祖知無恙復遍覓弟甥挾
以歸及倭定邑將城城所營度適當祖遺田若
干畝當事者議撥鄉田或令墾湖田補之先祖
試問曰汝意奚若先君進曰夫築城以捍衛民

民安田何惜矧鄉田各有分土墾湖力更倍且
滋擾請勿受先祖欣然曰正合吾意竟辭去方
避倭時家中服物器用貯別業爲僞倭所劫後
稍稍跡露或有首者先祖與先君謀卒不問先
祖積木若干章將爲叔祖置宅遭隣火延燒里
人願得十金可採先君曰木易得耳儻傷人將
奈何遂勿採歲戊午督學松坡畢公拔入泮已
未先祖捐館舍哀毀骨立殯葬一如禮是時家
漸落而祖母老善病乃早夜備肉食視藥餌而

以讀禮之暇受徒課業及門者歲不下數十人
 貧者修脯謝不受緯川馮先生倡會慈湖發揮
 文元不起意與文成致知之旨迺往從遊歸而
 澄心默證凝然有得龍溪王先生來自越復與
 往來質問二先生僉謂篤信力行無如楊汝位
 氏蓋至是雖受徒如初而已支離註脚若將不
 為沾沾經生之學矣歲己巳祖母棄世飲泣孺
 慕殯葬以禮悉猶喪先祖時而棲遲墓下匝歲
 忘歸胃疾實於是始然從此節飲食屏嗜慾一

切聲色玩好技藝之類澹如也外叔祖後湖秦
 公叅臬閩藩以書招之謝不往諸舅父素豐於
 貲未嘗妄有稱貸人或以窮愁請之者若罔聞
 知適冲宇顏先生歸自楚復敦慈湖之會遂師
 事之先生相與闡明學脉一言一行必相考正
 凡二十載中經督學晉川劉公倣庸林公皆拔
 置優列而竟絕意功名謝去青衿安貧談道尤
 喜開發後進隨叩必竭至忘寢食顏先生歿而
 諸同志推為主盟戶外之屨常滿丙申春胃疾

大劇幾不起俄而夢儒先授以止至善之義霍
然病已丁酉不孝勤幸舉于鄉因命之曰汝藉
祖宗之慶有今日當思所以立身行已者無徒
以榮進爲事吾素甘澹泊決不以溫飽累汝但
使吾得度越城一謁文成公及與海內同志互
相印可吾願足矣乃刪輯慈湖遺書名曰節抄
手錄太極西銘定性書識仁篇曰此宋儒四篇
大文字也又摘陽明詩數十章及前後名公語
錄彙爲一帙置之左右朗誦閒吟充然自適甲

辰秋以不孝勤迎養北上遂與越人士大會於
文成祠再會於天真書院至京偕中州江右閩
浙諸公會於邸越明年丘隴之念忽動決意南
還不孝勤百計留之不得以七月望解維潞河
暮秋入浙復爲天真於越之會抵家而宗戚故
老及同志者大半凋落歎歎不已丙午春以
覃恩例封儒林郎翰林院修撰不孝勤親齋
勅命併奉家慈以歸冀圖舞斑稱慶而胃疾倏
作溘焉長往矣嗚呼痛哉卒之日猶正襟端坐

作蠅頭楷對賓客如平時偶曾前隱隱痛不可忍遂一厥不返時家兄守書適之武林惟三孫在側呼曰吾將逝矣傳示二子必厝我祖塋之內此汝曾王父所留以遺我且吾不欲頃刻離二親也餘無一語及他事先君天性孝友持身介直嘗謂君子有終身之喪忌日之謂也值祖父母諱辰必先期夙戒質明行事祭畢出手澤示子姓涕泗沾襟下浹日不齒見祖母家故零落歲時分饗殮餉之為舅氏及諸中表具棺槨

者前後而七屆清明必親拜掃各墓下後并遷其香火奉於家至今不絕人以為涓陽之感弗是篤矣與叔氏析七箸遵先祖治命令嗣叔祖考而悉付以曾大父所貽業叔氏以前城基請則割先祖所增置薄田補之已復以地宅以山庄及什物請仍量與均分不拂其意叔氏逝而撫其二孤長曰守訓親為課督率蜚黌校次曰守議量才授以一業及二子相繼夭折而孀氏余弟婦曹煢煢相倚艱苦萬狀節序燕享每為

罷食姑氏二一適湯更兵燹寇盜之後轉展衰
微至或不能舉火輒隨多寡繼庚癸歲以爲常
一適孫其初家頗饒而後窘于喪葬婚嫁之費
至損家慈服飾助焉兩家者俱嘗貸馮觀察金
俱代之償無少恡迨孫氏絕則爲立後而湯亦
僅留綫緒爲納婦以延其嗣瓜葛之變輻湊紛
集中抱隱痛良有以也先君生應良止之兆後
感止善之夢其學亦以止爲宗而合楊王二先
生之旨歸之一止其言曰至善者卽天命之性

而人心之本體也一而爲一環而爲極上下四
旁循環無端而不離這箇不落聲臭不著方所
爲中萬感萬應殊塗千慮而隨時省察以求卽
乎是是謂思不出位是之謂止是卽所謂不起
意所謂致良知孔之一貫虞之精一執中文之
止仁止敬止慈止孝止信胥是物也又曰良知
卽天命之性慈湖所指爲自神自聖者也致者
不起意也不起意則動以天不鑿以人是爲致
亦謂之率性亦謂之止至善止者常寂不動也

常感常寂而不起意是謂止至善唐虞允執厥中者此也中者不落方所起意焉則落方所非中矣非至善矣故致良知者不起意之宗旨不起意者止至善之宗旨止至善者執中之宗旨名言之不同而實一也又言中若天平然上者天心中者人心人心符天心則中矣止矣精者不毫髮爽者也常不爽毫髮則一矣精一則性常存性常存故能由仁義行由仁義行者自然而然故至誠無息行仁義則勉然勉然者未免

起意豈能久而不變哉故學問有生熟而工夫無兩般其說如是故平居逐念逐事體認精密必求止乎心之所安處貧不求臨事不惑遇侮不校非法言不言非法服不服繩趨尺步絕無急遽輕率狀當少壯時諸子百家之書無所不讀後悉屏去惟取聖賢經傳翼以名儒語錄摘其言之致一者標題註釋或以己意附數語發揮之不欲別爲一家言尤絕口不談二氏之學人或以三教異同問者曰吾但明性命之理踐

身心之實而道固已該矣安事牽合附會爲嘗
謂古人以三日不櫛沐爲終身大罪雖盛暑未
嘗岸幘露體非甚疾病隆冬未嘗拒客燕居暱
處亦終日危坐老而益恭待親友隆殺厚薄各
以其情問疾弔喪不遺微賤與人宴飲雖極驩
洽不至亂嘗中夜歸見守者寒輒勞之或與之
食及至墓望而灑泣者甚衆所著有四書訓錄
對會錄藏於家其遺書節抄則邑大夫石乳潘
公業已刊行之矣卒萬曆丙午歲五月十一日

距生嘉靖癸巳歲四月十七日得年七十四

秦安人中丞公長子淮府長史震湖公女子二

長守書郡庠生娶學博芸窻葉公孫女繼娶鄞

城鸞洲顏君女次卽不孝守勤娶別駕蒙齋嚴

公孫女孫男八一聰郡庠生娶鄞城養微謝君

女繼娶舜南章公女一珩聘庠生亦明李君女

一琳未聘俱守書出一琦邑庠生娶左庶子源

明馮公女繼娶姚江中丞蒙泉孫公曾孫女一

琛娶毘陵舉人崑崙巢公女一瑜娶刑部主事

漢醇馮公女一璐聘太僕丞鎮亭趙公女一琪
聘光祿寺少卿行素劉公女孫女三一 字刑部
主事曙海張公子能恭邑庠生一字舉人邵越
袁君子弘諫郡庠生一字山陰朱文懿公會孫
曾旦俱守勤出曾孫男三德基一璉出德隆一
琦出德隅一琛出祖塋去邑東北七里許名曰
鳳山之原不孝兄弟既以丙午十一月初六日
循命祔葬而以是丐名世作者之採擇言之不
文情寔可憫倘蒙哀而賜之九鼎誌傳表碣惟
所命之則先君雖死之日猶生之年其自不孝
而下世世銜結無已時也謹述

勅封安人先妣秦氏行述

嗚呼不孝罪臯深重禍延先嚴日月不淹勉抑
從吉庶幾長奉母慈以永有依恃已酉冬孟上
疏陳情幸得 予告終養而甫及匝歲吾母復
從先君九京矣痛惟連屯朋蹇予焉鮮民胡以
自存因念吾母生長舊家食貧寒舍莊儉勞瘁
不可殫述而忍使湮沒無聞安用子爲所願據

拾大凡以干名世君子倘憐而惠之一言則泉
石輝躔歿且不朽不孝輩亦藉以逭罪萬一云
爾母姓秦氏大中丞嶼湖公之孫而淮傳震湖
公長女湯空人所自出也母生而端凝自幼寡
言笑絕玩弄中丞公謂淮傳公曰是女必當享
厚福適先君隨王父侍薦紳諸長者中丞見而
禮貌之因通蹇修委禽焉淮傳公在詹事府母
隨至邸奉湯宜人最謹頃刻不違左右歲庚戌
先君逆自京宗戚咸意貴家女必驕倨不習中

饋事母至則事上接下動中內則一切漿酒五
飯蘋藻修脯之類罔不潔治人始知姆訓所素
閑也初乳舉兄守耕數歲殤丙辰邑走倭兄守
書方在妊母左手掖王母右携甥女避山谷間
是秋八月朔訂言倭復至兄離娠纔五日母一
手掖王母一提抱走復如初先是來歸之歲湯
宜人殞于京母以弗克侍湯藥與哭泣隱痛不
已且恐傷王父母意每節序涕泗暗集侍女輩
至不敢竊視及戊午冬仲淮傳公驟捐館母匍

匄歸哀毀彌篤未及虞而不孝生母含淚忍痛
推燥就溼備極苦楚視蓼莪詩人所稱鞠育劬
勞抑又甚矣詎意不越歲王父暴染瘋瘖不語
者兩浹旬先君醫禱百方竟弗起痛隕者屢母
從中調護黽勉拮据共襄大事門內之政井如
也先君雅不能治生人產旣丁倭難載罹大故
重以王母善病不忍離僅受徒効筆舌耕而母
朝夕調衣飲視食息務貽王母安俾先君無內
顧如是者凡十載甲子夏復舉亾弟守儉前後

舉不孝兄弟皆親乳哺未嘗一置保姆分婉數
日內卽起坐理襁褓亦未嘗一委手侍兒輩迨
王母卒益殫力佐襄事而家愈匱卽侍兒亦屏
去至滌滌紡紝之務無不身任之爲不孝輩具
衣履刻期就緒性畏熱每迎風坐南牖下終日
不輟或至夜分一面課不孝輩讀而痰嗽之症
則已胚胎於此矣閱壬午守儉年十九成長殤
母痛悼不已而不孝輩棘薪無成無能承驩膝
下餬口四方什九在外母督率子婦先暑戒葛

先寒戒絮飭書郵遺遊子者無後時亦無虛歲
不孝輩春而出及冬而歸見母容色無恙痰嗽
轉甚勸母節勞服藥母曰吾性不喜閒又耐
飢藥無以爲也不孝旣舉于鄉母曰吾秦氏固
少壽種父母二弟或不滿四十或不踰五十而
吾幸有年天實以貧苦我今汝雖發科然自此
費益漸廣非愈加剋勵何以支攻苦率先復如
故甲辰就養北上偶道服青州白丸痰嗽少間
至京遂不甚發母曰吾幼習京師豈於水土固
宜以是先君歸自乙巳秋而母留邸舍丙午入
春體稍稍倦醫家謂脈有歇候此服青州丸燥
烈所致且北地苦寒多向火不便調攝必歸東
南受融和之氣庶延壽命不孝亟求 冊差并
載 封典馳而南冀稱雙壽觴夫何舟至濟寧
先君訃至母驚慟不自持不孝痛念二人生平
未嘗有經年之別今幸藉養育恩得寸進而致
使垂白父母頓成契濶恨不蚤圖家慶同父南
還母亦用是追悔長途鬱鬱不樂比抵舍幾慟

絕勉救不孝輩治喪塋無使失禮既竣事則率
先子婦及孫婦攻苦亦如故戊申服闋卽勉不
孝使戒行已酉夏忽中風厥復甦母素不受參
餌醫家亦謂痰盛不宜參至是竟以參效因促
不孝曰汝荷朝廷殊遇不得自便况吾病已
愈汝兄善調理其亟之官以怡我老景勸諭諄
薦不孝不得已奉命至吳門而夢寐驚悸亟疏
告歸母亦遽然喜暨庚戌夏症再發再旋愈
秋仲又再發又旋愈而天罪諸孤倏焉降割遂

於臘月十八日奄忽逝矣不孝晨起問安尚
然甘寢及寤進茶湯視少徐氣出不復入急呼
之不能應投以蘇合牛黃等物俱不受須臾日
遂暝嗚呼痛哉母天性朴素鮮潔之服非歲時
吉慶不輕御體食取蔬糲適可不求甘脆不蘄
充飫嘉蔬時果必以薦廟隨分遺至戚或留以
待客未嘗一入口時時具旨蓄禦窮不忍暴殄
一物先君好譚道居恒戶屢嘗滿與客暢析疑
義移日竟夜母躬爲點茶供具垂老不倦或基

之老人何復以此自疲母曰彼所交爲性命來非尋常應接也吾安敢漫承之故先君一生矻矻求友實藉內有良佐云遇祭祀先期夙戒次日寅起理笄飾卽親視豆具或請以授能者曰吾見切肉不方正蔬茹不豐潔不能入目非好勞也及至祭歛容穆拜見有跛踣不敬者至形於色祭畢偕諸婦享腍餘歷數王母而上某如何孝謹某如何勤儉無一語他及居恒與娣姒諸婦宴集手不廢絲枲笑不齒見有佻冶嫫媸者介於側輒拂衣引去娣姒而下咸肅然敬憚之長姑適湯者爲湯宦人親弟婦母於秦稱甥於楊同行終身不竝坐丙辰之變奩具寄外家者悉付諸燼又解遺橐助湯女嫁後再貸孫姑女簪珥不及償亦不問繼湯宦人而母者爲呂宦人少母二歲事之如親母女弟適袁儀部者出自呂友愛若同乳弟外叔參藩公及王恭人視母若女母亦視之若已父母雖貧窶終身無疎節聯屬兄弟無間言卒之前十日爲不孝墮

地辰母問今日有客否不孝對曰有客爲誰曰
秦宅諸中表母喜起攝衣延見諸子姪輩畢命
就外坐呼諸孫次第來侍食母素不沾滴酒是
日引滿飲一盃連進肉食數四已復俛諸子姪
別乃就寢自是坐起飲食日以爲常不孝方私
心竊自喜以爲胃氣且漸開體漸健而旬日之
後忽成大夢嚮者諸表之會若預作永別狀豈
不痛哉母以皇太后覃恩封安人率萬曆庚
戌十二月十八日距生嘉靖壬辰二月二十八

日享年七十九子姓姻族具載先君行畧中不
孝輩以辛亥二月初二日奉襯啟先君壙合塋
蓋兩踰年于茲矣風木含悲梧捲飲痛而未有
片言銘諸墓是用搵淚具狀五內摧裂語鮮倫
次惟名公勿吝如椽俾勒之貞石將逝者若起
于九泉而生者啣結于百世不孝輩不勝殞絕
聽命之至

傳

邑侯策齋劉公名宦傳

史勤氏曰夫治太柔必廢太剛則折惟體道君子學契真宗性克交濟用能以道化民所至翔洽彼夫生有榮號歿有奉祀微直廩廩德讓遺風也 國朝自文成夫子以道學樹勛猷致良知之旨與慈湖不起意寔相發而其傳盛于江右一時吉州高弟若南野歐陽先生劈泉王先生中洲郭先生洞山尹先生文章政事爛然史冊其餘嚮風起者背相望也策齋劉公初尹慈寬而斷威而不猛吏畏民威號稱上理而表章

慈湖之學功特偉焉迨立朝抗直居鄉表正庶幾蹈道終始者公嘗書邑齋云秀翰終成棟精鋼不作鈎似乎刻意尚嚴然慈民愛慕彌久彌篤抑何惠也夷考其學問淵源所自寔出數先生之門有以夫作策齋名宦傳 公諱逢愷字虞讓吉泰和人劉出長沙定王後歷宋至 國朝代有文人高祖彥桓曾祖昇祖汪皆以篤行稱父坦溪公端祥以公貴贈光祿丞公生而奇穎四歲入家廟能舉祝辭稍長博記誦善屬文

始受業劈泉先生聞性道大方遂駸駸嚮往既
補博士弟子員試輒壓卷甲午舉鄉薦乙未不
第歸與中洲先生聞發陽明宗旨先生許以一
日千里願加策勵故號策齋戊戌復不第聞南
野先生司南雍特往稟業先生之教以致良知
爲主而於義利危微之辨開示特切公銳然刻
厲必欲身體而力踐之辛丑成進士爲洞山先
生門人因師事焉癸卯授知慈谿縣公律身嚴
字下慈涖法明聽事斷興利剔蠹惟日不給初

視篆訟者磨集庭下公立詰無情者斥遣之當
聽理者剖決無留邑詫爲神明一夕夢童子以
冤訴旦坐堂皇發謀殺子者奸立抵所私罪是
夕復夢童子來謝事聞部使者一切疑獄及鄰
郡邑事輒付公聲稱遍浙東矣邑故無山稅獨
貢茶每開局採辦諸科歛無藝吏夤緣飽所欲
民甚苦焉公定爲令除正貢外銖兩無羨取至
今賴之諸邑欲均山稅於慈公卽以茶稅折之
議遂寢自役法敝胥吏多受富人財或閤門不

冲標衆善自許惠賒執塗矧同恃怙家脩靖共
端詳淑輔竝稟愛勞蓄儲閨戶厥施漸窈筮寄
明府晉敷春官容臺儀羽約訓由已循物爲矩
有道之傳受天之祐奕燁龍章憲垂惇史惟茲
潤身宜于吉土木秀山名鬱葱南浦施于雲仍
振綿遐武

繁昌令回山向公暨配戎孺人合葬墓誌

銘

晉慈向氏自獻縣公忠貞貫日天錄其後裔文

章政事爲世推重如叅藩懷葛公侍御明臺公
觀察少葛公其著也回山公雖位不滿德乎而
司鐸則菁莪洽三地製錦則棠柳蔽百里表正
繼軌于文範介直推重于旦評試與諸君子挈
長度大未之或先也公捐館旣六載而仲君建
平尹儼然飭介紹肅禮幣齋孝廉馮咸甫所爲
狀謁余銘其墓按狀公諱陸字叔敏別號回山
系出宋文簡後南渡時有士傭者扈從至浙遂
家姚江一傳有恒徙居慈再傳壽受慈湖學于

寧波府志卷之七
水主事值虜寇後繕城修備繁役竝與公承檄
督治工用告集尋以外艱去再起爲武選主事
未幾改光祿丞是時肅皇方事祠禱費數倍
平時閹豎乘而索取莫可稽覈肅皇劄下內
閣詰供應不支狀寺長貳惶怖莫知所對公毅
然倡議謂宜請自今每月查刷費格具報章以
聞衆屬公草疏援筆立就委悉剴切上爲之
霽威一切如公議歲所省冗濫無筭三載奏績
制敕特加優獎向用甚殷而分匱子銜公不

徇已嗾當事陰抑之又三載量移尚寶卿分宜
敗人率訟公淹特擢南太僕少卿而忌者復議
爲驟竟中飛語免公方爲滁之遊聞報自若歸
經廬江士民追送攀泣如初去廬江時公抵家
則故宅已燬廼置一室城外深居自得蕭如也
日聯鄉族長老勉以力田孝第至事關一邑殲
盜布利則殫力不憚尤喜獎拔後進規人過失
與中丞魯魯原公競以學問相齟切曩所云身
體力踐者殆老而不懈卒年五十八子澗生于

慈登丁卯鄉試兩上公車不售服公操練此心
之訓高尚不仕孫璞以文學有聲澤未艾先是
慈以名宦俎豆學宮者唐房公瑄更邑締制與
慈終始尚已宋則張頴棊清與堂俱名林豹孔
武殲逆若腐逮入 聖朝決獄如神囹圄生春
則有龍公伯平量興市利永垂世則有賈公奭
新學校藝譽髦斯士則有胡公瓊甘霖應禱反
風滅焔則有葉公諫最後則薛公應旂改徙茶
局繁費是節蹶起人文寔登群喆斯皆表表當

時足垂不朽者然僅僅八人止耳蓋其慎也記
者謂公清畏人知柔惠且直士有淳風庭無冤
獄殆兼諸君子之長而有功慈湖羽翼聖真尤
宜百世祀者迺鄉邑有祠廬江有祠慈獨缺焉
所稱讐德報功其謂之何用是愴于厥心萬民
不若至是請於學使者赤石陳公陳公署其批
曰文章爲一時山斗政事負當代經綸空從輿
論以光明德蓋距公六十餘載而有是典稱異
數云釋奠之日薦紳及弟子員無問識不識肅

然秉德父老及見公者咸舉手加額庶民環橋
門而觀禮者如市孟子曰善政不如善教之得
民深也詩曰無射于人斯吁若公者足當之矣
贊曰河潤九里公潤無已澤斬五世公澤靡既
曷克臻此體道罔愧肇祀自今永憲來禋萬代
南崖老人翁傳
老人翁姓陳諱世恭南崖其別號也陳世居烏
傷之龍祈里以尚氣強有力亢其宗翁獨恬澹
孝友好施不倦於人無競距生成化某年中秋

日卒萬曆癸未歲享年百有八先是娶守黃公
倬丞李公燾常延之上賓聞其狀部使者蕭公
廩具題賜冠帶歲給米帛贈之聯云壽域天
開眼見六朝盛事老人星見躬逢百歲中秋又
云福祿壽具慶一身東海蟠桃正熟父子孫同
居五世燕山丹桂聯芳蓋公之子爲九十六歲
吉庵廸孝事老人處族黨以醇謹聞亦爲邑大
賓而孫見洲公文亨授散官抗直不屈拂衣歸
來壽踰稀齡手不釋卷以一經課子爲今儲封

心夔公大章蚤歲卽蜚英鬻序燁燁有聲故預以聯芳期之語載金華府志中後十餘年毘陵周公士英尹茲邑復輯其志加詳焉比甲辰而心夔子于京字當世遂用毛詩舉進士老人餘慶方新未艾蕭公聯若符券云楊子曰嘗觀太古多上壽微獨氣化蓋必繇純德焉輓近自尋傾覆輒謂仁不必壽天道或爽其然哉其然哉然考之載述稱百歲人者代亦不乏若張蒼無齒而飲乳竟越期頤竇公失明而鼓琴爰益性

命寥氏餌丹汁井而老壽世其家甘谷服菊液泉而長生數十姓皆有藉助非偶而已也迺南崖翁好行其德而身享大年施於孫子豈俟伏氣吸瀝爲哉昔龍祈鄉舊有大溪巖石盤結數里諺云白石粼粼難出貴人老人歿未幾而龍沙飛護石隱不見遂顯當世將壽家壽國竝垂不朽於是乎在厚德食報詎虛語耶假令老人而在雖爲之饋醕所忻慕焉

醇懿先生虛溪姚公誄

醇懿先生不肖勤先君之師也先君講德論
道必稱引先生以爲六經之摯詔孔顏之宗
臣蓋余從總帥就塾時已悚聞之比長獲交
先生之孫汝行氏因遍讀先生藏書仰窺先
生之學術行誼躍然興起人代杳睽心印若
揭矧服義下風親承音旨者乎嗟乎西河之
風不墜匡鼎之說嗣興茲以詩名海內微先
先誰爲嚆矢當先生之沒也及門結摧梁之
慕鄉曲奮惇史之筆旣遠取江都近衷河汾

上謚曰醇懿信矣夫古者讀誅而定謚余乃
徵謚以命誅雖文漸四句之疎而澤沾五世
之近薦德有經叙哀維義云爾其詞曰

赫赫巍宗派衍帝潢精一廷授氏以德彰陳胡
流喬奕世阜昌上相匡唐上將翊宋門閥蟬連
牒不勝頌五馬南來在越之涖數傳徒慈聖童
崛起徵君名諫接跡濟美嘉祥盎勃乃出英儒
函三苞六與天爲徒口代津梁躬秉楷模麟不
受綬鳳不羈斂賢運半千適應斯符應符維何

生感異夢目識之無弱寧好弄瓠葉戲陳棣儀
凝重典墳棟架羣籍充棟若餌菖陽諷輒成誦
乃披逢掖乃摘文章執耳登壇萬夫之望維時
鴻葉蔚數宗良司馬人鑒史公雁行攀安提萬
詎足概量子舍久依偃室絕趾或以聘來敦亦
不起弄鳥舞班惟求色喜蘭垓之慕垂白未已
高言四始屑水繅絲扶風絳帳伊洛臯比竊其
餘緒鼓吹明時匪鴻之力彼翼安施旣脫言罟
旣捐名畛尋微致遠畢力抗引以觀朱陸何必

矛盾鞭影斲輪悟機獨敏冲夷宥密絕學是準
聞者嚮風避席握衣操鏡扶翳虛往實歸適鐸
載鳴迄於古稀前有文元後有醇懿宗門意脉
其揆一契桃蹊不言谷馨唯蕙累德難名儀畧
雪涕嗚呼哀哉世儒嘒嘒縵行無家緒分而閏
教舛而譁肅肅先生醇粹無瑕孤往獨復齟精
儻華昭揭正經屏塞回邪景茲三立壹惠以志
庶見曠典表閭崇祀淑艾匪遙吾黨之事嗚呼
哀哉

寧澹齋全集卷之八目錄

祭文

祭座師朱文懿公

祭少司馬魏見泉先生

會祭楊楚亭憲長

祭座師楊文恪公

祭馮母劉太宜人

祭大行潘禹門年丈

祭黃性初年丈

會祭陳渤海宮允

祭劉封公臨海先生

祭張母洪太恭人

祭座師唐宗伯

祭顧太師母

祭中翰陳心義年丈

祭青州郡伯劉葵宇年丈

祭宮庶馮源明親家

祭龍溪大令陳位宇年丈

祭姚母馮太孺人

祭王母羅孺人

祭許母張太孺人

祭外父繼蒙嚴先生

寧澹齋全集卷之八目錄

寧澹齋全集卷之八

句章楊守勤克之甫著

祭文

祭座師朱文懿公

嗚呼悲哉吾師之逝也吾師擅董賈之才負伊
周之任當夫廻翔金馬狎主詞林而片語直通
天神隻字足垂袞鉞天下孰不仰其文章陟宮
端而馮翼孝德之倚賴晉秩宗而典章禮樂之
輝煌天下孰不仰其聞望繼參端揆協恭寅亮

荃宰同心正直是與傲泰隍而不尸其功調鼎
鉉而不居其美天下孰不仰其鴻猷與駿業迨
夫獨典要樞久專政柄翼翼厥猶慘慘畏瘁知
罔不爲忠靡不殫至貌爲之癯而神日以耗庶
幾夙夜匪懈靖共爾位乃上之所葵於師者日
深下之所求於師者日備而師不可起矣嗚呼
悲哉人亦有言其望彌隆則其責彌重其思愈
篤則其知愈寡夫相臣所爲當天下之艱鉅而
稱天下之極忠者惟其精有獨注而不爲衆分

誠有獨結而不必衆喻衷有所獨苦而不容以
告人也如使不專于所獨而日揭其心事以號
招于人則彌縫之術或幾乎窮而靖獻之思反
幾于貳安稱相臣爲矣此吾師致主致身之
貞憂國憂民之摯所爲九重知之天地神明
知之而人人或未之知也然使當爰立之初終
老東山怡情丘壑豈不可超然于畏途而愜焉
江湖甘同洗耳何以副側席之望則師固不忍
又使當引年之日一辭輒退生出國門豈不可

少塞乎多口而慙焉拂衣自同悻面豈所施于君父之間則師亦不忍惟是處不忘君出而盡瘁一日居其位則一日竭其慮而躬且蹇蹇而憂且悄悄而目且不瞑則固甚賢于生何者其精有獨注誠有獨結而衷固有所獨苦也且臣道有終而臣職無終彼苟倖人言無及自謂當爲止此而快焉瞑目者猶忠之薄也惟精不爲衆分誠不必衆喻衷不容以告人而抱痛長終則上臣事君存亡以之而猶未卽安者殆庶幾

焉生有清忠端亮之論沒有祭葬贈謚之榮夫非所謂九重知之天地神明知之者耶而况夫天無久而不定論無久而不明其共知共信者終有在也然則師亦可無戚于幽冥而無憾于滋憎矣獨計勤也才旣疎庸性復迂拙生平未嘗一登大人之龍一通要津之筏而甲辰之役濫辱甄收僭先班筭且以一介草莽特遭殊遇師固何私勤亦何嫌而成我等于生我則捐糜不足報矣夫何匍匐南奔茹荼數載曾不及

時沐夫教誨親覩其拮据而天不憖遺幽明頓
隔謂之何哉陳詞告哀聊以酹臆師其鑒之否
耶

祭少司馬魏見泉先生

嗟惟元老常獄生申國之正氣人之天民宗祏
大名畿南三鳳接武鶴行譽符伯仲悠悠南國
爰理于荆茅靡波隨頽風漸成公當其時神君
慈父相府戒嚴單門式舞 璽書內召驄馬如
龍鐵簡霜飛風清殿中公當其時止輦借劔賜

環賜玦惟

帝克念兩遷終歲銓部南都公當

其時淡然若無冰鑑昭昭大苑井井旣哲且明

爰定而靜

帝思弼直召佐大官公當其時詠

歌伐檀京兆旬宜銀臺封駁門鮮陽喬味耽淡

泊三晉絕塞控宣翼雲狡虜要求貂璫獬獫公

當其時淵停岳峙免胄威宣露車禍弭心懷魏

闕身繫封疆一時國是片語真常九載窮邊馬

騰士飽虎冠魂褫鼠穴跡掃忽瞻親舍白雲繞

之草疏陳情皇皇歲時孰測其端孰隨其後甫

進壽觴倚廬在疚 帝鑒純孝襄事加恩公當
其時鷄骨銷魂白日千年節哀順變懷此膚功
更膺殊眷 詔晉司馬虛左遲卿金幣輝煌胄
監分榮凡百薦紳相賀青鎖求舊使功聖心無
我云胡不吊喪茲達尊白璧黃塵卿月昏昏嗟
公之儔汲鄭曾史嗟公之助左右終始嗟公之
介砥礪威稜嗟公之節茹檠食冰昔人蓋棺乃
待論定如公生前共仰獨行他人謝事或多後
言如公勇退望重台垣生抱純忠死猶齋志不
朽者名不息者嗣勤等通籍後進寤寐儀刑老
成凋謝哭公失聲絮酒炙雞采采澗沚悽愴焄
蒿右我簠簋嗚呼哀哉

會祭楊楚亭憲長

惟公以台鼎之器負斗山之望當其登金闕而
陟玉堂也揆藻則衙官班馬臨池則驅役鍾王
真足闡石渠天祿之藏而踵文懿公之芳躅矣
已而出叅藩臬屏翰有方視學嶺表譽髦孔彰
建南分割而一方奠于覆盂風紀總持而八閩

鞏于苞桑值島夷外訖人心內煽 天子方厯
 東南之慮而四境晏如海波不揚誰其功也嗚
 呼以公之才竟其所長使入典清華上叅密勿
 卽古所稱為霖作楫者豈多讓焉而一疾爲祟
 乞疏歸鄉甫閱歲而訃音至矣天不憖遺哲人
 云亡公固無憾駕雲徜徉其如邦家倚用薦紳
 景仰何哉余等忝爲戚里復同詞垣固夙傾其
 有用之文章而矧今閩事多虞時艱孔亟思起
 公於泉壤而不可得矣是用辦香束帛陳詞爵

觴靈如不寐願予斯將

祭座師楊文恪公

嗚呼天佑 聖朝實挺名世業擅千秋道隆萬
 禩誰其當者惟師允備保茲 天子輔導元良
 入弘啓沃出定典章衮鉞在手雲漢爲光譽髦
 多士師嚴道尊網羅俊乂桃李盈門方推枚卜
 望重台垣憶昔丁酉持衡文藪竭海探珠傾山
 取玖惟予珉珎亦宗匠剖兩赴燕市空惹京塵
 人輕康瓠師擬席珍知我生我寓內幾人夢寢

金華齋全集 卷之六
六
屢勞慮虛雅望適遂初心濫標人上誰作梯航
茹茅寧忘木天翱翔伏讀中秘 帝簡吾師掩
室教肄取裁百家漱芳衆蕝聚樂何常丙舍索
居顧謔明訓幸免憂虞方思北詣卒業精廬道
貌天形宜弗而壽朝日秉虔如 帝親就云何
一疾忽報歸輒鳳兮陡隱玉也頓藏時微楷式
邦失棟梁矧余弟子能不重傷驛路蕭條陰風
飄瞥空賦大招中腸若割幽明判途堪此長別
天篤降喪人獨奈何壽年有旣德業難磨 九

重曰噫爾庸寔多爰加駿秩爰易鴻名輝煌邱
典奕葉旒銘孰謂師亡沉淪九京靈輻歸闕道我
錢塘盈盈水隔遙望徬徨嗽詞告酌顧此微將

祭馮母劉太宜人

赫赫宗劉閨門靖共慈湖北潔世彩蘊琮猗哉
淑慎以歸于馮堅貞格天嚴凝氣鍾繫昔太翁
之舉孝廉也皇州起鳳北溟翔龍開甲第于燕
邸步茂闕于句東種玉而壺昭寅燕錫麟而井
見祥虹其維內則之懿以佐君子之風旣太翁

之蚤世也城烏候旦秋霜隕空寢冰飯荼靡他
義融肅肅哲嗣慘慘孤踪豈難一死爲忍三從
燈窻緝繡義方九熊鸞鶴翱翔以排雲鯤鵬直
上而搏風其惟令範之素以啓昌大之宗迨夫
我親翁之奮興也富石渠之秘貫竹書之叢載
非常之筆班最近之榮萱闡以節而召祥 楓
宸因孝而知忠表棹楔于宅里馳象翟于厥躬
其惟推美于內德以徼異寵于 天衷廼者十
數年之間 帝簡學士相德青宮屢典春秋之

文命數精巧匠于金鎔褒南國得人之盛將指
日而晉貳公北堂日永庭前蔭穠容與忘憂旋
稽奠苒庶幾太夫人以半生之鬱苦履無限之
亨豐報未亡之榮壽慰夫子于九京之中也奈
何自勤之南下驚傳坎壈之游逢芳蓀首萎閨
玉愍凶顧茲眼前之途境何似往昔之最恫抑
又暮景之弗堪實勞我心之憧憧而蒼頭卒至
言告膺胷仲春庚戌太君已終爲哭失聲相向
盡恫天乎天乎以貞慈若太宜人而儉於年以

寧海齋全集 卷之八
孝敬若學士而冥冥之罔通耶云何失聲我有
私悰丙午奉使別甫一冬痛冢婦之天長安歎
生離而卽殯宮酷乎二豎先後殤童且不數年
而並慘兩家之失恃奚忍言不孝之傷吾翁俯
仰之際競想言容萬里馳臨五內若攻爰酌清
醕侑以江鮑直悼邦家之背母儀豈爲一人之
骨肉而心有蓬

祭大行潘禹門年丈

嗚呼元起稟雍州之勁氣浴涓水之清神孕嶽

而生肖嶽而立儀標裴玉聲叶陸鍾可不謂魁
梧丈夫哉若乃胸羅百代業富千秋韞伯恭之
黃中發宗元之繡口是尤有吐納造化瞬息古
今者矣嗚呼相形若彼論心若此而胡僅僅四
十有一終耶聞元起識兼星平數精生尅自謂
運命已盡果爾則榮枯脩短信有尸之者而尺
幅一定竟無何歟夫性命一原運數一理道備
于易元起以易起家明進退存亡之正固宜其
類趙達之知終匹景純之計日也然使元起以

是栖真無用詎不可終其天年而受責頭顱貽
寃短髮士或羞焉今且揚名天下列職大行弘
文壯志業見於此矣况乃森森玉立有數丈夫
子所以發摠千秋之業者又有在耶然則元起
亦無怛化爲矣余等誼聯同籍情與休戚而兩
朞之中作者八人興言及此涕旣隕之是用陳
詞薦醴以告吾私神如不滅儼然右茲

祭黃性初年丈

嗚呼昔人謂天地爲不仁呼造化爲小兒予固
訝之而不能不憤惋于士選之逝也士選秀毓
清漳靈鍾天柱得天亦云茂矣於書無不窺言
語妙天下儲材則旣富矣甫一試而鵬奮秋風
載一試而鳳翔春曉遭際非不殊矣夫寶劔出
匣而鋒莫犯駿馬下阪而勢莫遏此非其時歟
夫何奉詔歸省戒途未幾而訃音遂忽至矣
嗚呼胡爲其然也意者蓼莪飲慟風木興悲感
以遇增痛隨喜極故戴星披霜竭蹶敝策而遂
以是殞其身耶果爾則其達也旣以名顯揚其

親其歿也又以身歸全其親倘亦可以快然長
往矣否者體親憂而疾是慎保遺體而善自完
始事親而終事君古大孝所爲當不止此夫詎
不聞焉而顧自同芻狗甘爲小兒所愚弄也竊
謂士選斷不其然余等誼關年籍情與休戚爰
用炙雞絮酒瓣香束帛遙寄而酌之曰胡劔斯
折胡驥斯蹶天不可問我心則憊士選有靈其
奚辭以應我

會祭陳渤海宮允

波崩風駭世路傾淪使我公進不安於朝退
不謀於海濱將翺將止嗟咄食貧其稅不具公
百指之朝饗而秣不給公三月之醇謂造物所
以特公亦甚矣而詎復其年之齋不下壽而露
薤已凝塵嗚呼痛哉公豈爲此拘拘而還返真
公家中丞瑰略獨操石亭先生光遠他耀繫我
公之嗣武瞻海東之二嶠彌亮青宮摘詞綸
誥爰秉藻衡游登譽髦天祿石渠咀華陟要腸
擴擴以無它氣磊磊而特趨凡世所以用公未

窺公於一豹或自邇而卽之亦徒得公於其貌
尸讒自庚帝閹孰叫聊一澆其壘塊曾何心於
睨傲世所云喔咿而嚚兒或通脫而佻巧公豈
其人哉而曾不得彼眈眈者開口之一咲嗚呼
傷哉賈鵬徒悲仲翔獨吊扶遐溟以何羅強尋
聲而襲噪公胡遽岑岑而捐曩日之豁如言白
其馬噓霾長嘯迓奏笛於桓伊解漉巾於栗里
尋善釀之紀叟偶青蓮而排調松栢後身幹柯
猶矯矧茲雛鵠之翾翾行雖嗜而唳嘹長於上
古繫茲不老馮雲輶而來歆忻余言之匪謬蒸
氣浮浮爛薰懸照

祭劉封公臨海先生

嗚呼哀哉吾太師臨翁之訃也吾師之泣吾寧
也以直心行直道而加之仁恕民用不寃以是
官雖以法爲名而士民愛之無異赤子慕慈母
此豈無所自哉翁之潛德緒餘庭闈懿範茲少
概見矣稽諸仁壽之理卽享百齡奚啻而乃僅
踰稀年終耶吾師孝友天植往歲聞伯氏之喪

寧濟齋全集 卷之八
食不進肉衣不御綺慙慙然憂太翁之弗堪也
去歲聞翁之壽而康則愉愉然喜以爲庶幾哉
可無內顧以盡心民事於是戒役前迎就養官
邸且朝夕延頸計不日可至而詎意以迎養遂
竟以訃音來耶榮封在卽胡不少埃旦夕以慰
孝子心乎痛矣痛矣寧之士若氓向聞翁之壽
罔不懽欣鼓舞遙祝崗陵旣公徒之往迎也咸
喜色相告曰自今得爲借寇計矣民惟慮師之
以秩滿應辟去豈虞其罹此大戾使人欲攀轅

而不可得也勤荷蒙甄拔恩同大造某京邸受
知情投魚水夫寧直父子骨肉手足間哉聞翁
之訃而悲傷慘怛視諸士民蓋相萬也嗚呼吾
師之戒行也卽琴鶴圖書且不備善養真不愧
古人他日位通顯樹鴻烈以慰公於九泉者特
餘事耳翁亦奚憾吾等亦奚以悲第誼切師門
情關休戚生旣不克覲翁之儀容沒又不克挽
翁于窀穸遙望遼陽慨焉傷盡陳詞告哀涕泗
沾臆靈其如在皇于几席

祭張母洪大恭人

嗚呼太母駢鸞驚乎乘彩霧乎返寶婺垣會王
母西池上乎胡訃奄至奉母諱乎嗚呼憶厥懿
徽孝娛尊章克敬克戒儷太翁乎爲孟母迪子
賢爲陶母勗子廉爲雋母問子平反爲鄭母聽
子政治爲公父母老猶績乎於都哉訓比母師
名輝贊冊伯仲奕奕諸姓英英祿無窮乎而尚
何恫乎嗚呼太母則猶予母也余於親翁居同
里則母同業同社則母同舉同籍則母同官同

邸則母同弱女備孫嬪則母同天寔不弔奪我
依恃嬛嬛銜恤俛俛何歸每登堂奉母驩猶母
也奉母教誨猶母也嗚呼今已矣余母遜中壽
一歲而三釜之日淺太母先三歲享祿養而壽
減一兩家哀子抱痛維均畫焉傷心不知涕泗
之霑臆也嗚呼靈輻已發馬鬣斯封越南燕北
一酌無從臨風遣絮我心憧憧西池宴罷右此

哀悼

祭座師唐宗伯

夫子

祭

祭

嗚呼我夫子之逝也夫子鍾扶輿間氣爲昭代
師臣在世台鼎在天星辰當夫乘雲排浪則萬
杰罕望其後塵揚芳揭藻而詞壇悉讓其嶙峋
是皆以科名文彩翕絕夫子而夫子視之彌歆
韜之彌恂夫且生平必殫夙夜維寅潔金玉以
爲履澄江漢以爲神士競于華輦悅是逞而黜
浮振靡力返以淳世競于適逝波俱往而秉正
嫉回力挽其淪宮端引翌十載匪懈而司格于
預爲度以身珪璋大命黼藻鴻猷而凜茲衮鉞

炳矣絲綸若乃摠禮闈而司命我多士也無拂
衣以示意惟投帽以矢公剖璞必耀範金必融
班玉筍于點筆揭氷鑑於當空旣弘之以薪爇
仍砥之以磨礱登枝戒其忘本蕙表懲其棘中
呈面恥其衷甲人貌醜其腥風然且飲以和煦
飫以醇醲靡叩弗竭如響應鍾靡情弗達如照
必容蓋置身喬嶽者夫子之不隨俗爲通而多
方卵翼者夫子之善與人同勤等縱捐糜而匪
報庶怡恃以無窮而胡服官盡瘁蹇集厥忠閫

寧波齋全集卷之八
儀聞訃重以隱恫壽未滿德溘焉告終嗚呼大
星忽實掩嗟不東朝虛玉鉉士失棟窿詎不悲
哉勤等登夫子之門者其人三百而啣夫子之
恩者其心則一如逝者之可代卽人百其何惜
其如天不可籲數不可測徒令遡衣鉢而莫追
想儀容而沾臆也惟是名垂三立業衍千秋樓
臺鮮萊公之隙地桑田遜武侯之遺疇公門有
桃李之植私庭絕槐柳之留矧克前之蘭桂盡
逸足之驕駟逮蓋棺而論定邁往詰以爲儔夫
子方騎箕直上駕雲周遊而於怛化乎何有獨
余懷兮罔極轉苑結兮徬徨瞻茆峰兮嗟峨隔
易水兮渺茫閔靈輻兮在馭嗟遠道兮阻長環
相嚮兮失聲酹血誠兮未傷

祭顧太師母

於維太母秀毓坤維德函異體婦德孔彰母揆
聿啓丕赫太翁爲世龍光中外敷歷楚越流芳
母也佐之履豐戒盛勵以奉公翌以敷政天子
曰嘉寔資姱脩翟冠寵錫龍章累褒翁蚤騎箕

徜徉霄漢誕挺我師狎飛刷翰臚傳象闕望著
詞垣筆操衮鉞價重璵璠文昌高懸斗山競式
孝德翼馮宮端側席翩騅繫念陟屺縈懷瀝情
歸休綵儻庭堦帝眷儒宗復綏孝子特晉南均
卽家爲仕出入色養玉爨金壘鈴索將振鞞萼
遙開雁塔捷聞憲闈載喜社與德齊榮膺未擬
胡遽溘然神遊帝鄉朱幡玉幢白雲渺茫嗚呼
蘭萎留芳月沒存照母德彌芬母名彌耀行封
馬鬣以承恩馳司空治竈宗伯陳詞勤忝師門

獲階寸步振拔之仁洪于乳哺祈母大年以報
所私倏聞仙逝匪夷伊思方圖進觴而爲之奠
方圖祝釐而爲之唁勤亦有母喪未及祥煢煢
墓田情倍內傷執紼無從臨風苑結束芻告哀
鑒茲悽切

祭中翰陳心莪年丈

嗚呼宜甫曾羅百代業隘千秋志凌霄而直上
詞倒峽以狂流薦于浙則鄉推冠冕舉于燕而
世仰驂騶斯非天所獨厚士鮮其儔者哉胡乃

名上南宮臚傳北闕秘省之授指日可必而
顧濡遲待詔積以歲月迨夫朝方拜命夕已永
訣賀者未畢吊者就列胡數之竒胡命之劣痛
矣云亡我心則愒雖然當其流連金馬累月不
下氣躁者憤心競者詫倘甘枉尺詭遇以駕詎
無他局榮名可射詎無旁竇餘瀝可藉爾寧株
守而待斃無寄逕以自庸寧貂敝而屢空無投
牘以爲通方且研求世務遣興詩筒將致遠以
用大肯隨世以就功而形勞神澁蹇瘁厥躬賫

志以歿抱恨長終凡我同籍能無悲恫嗚呼士
固有辱身泥塗槁項穹宇如草斯朽如鼠斯腐
孰與生不愧形死不減名縱服衾其伊始同裹
革以爲榮况乃有子竒穎頭角英英鴻猷駿業
行發揮其未盡而獨不含笑于幽冥是用陳詞
酌酒慰爾仙靈神如耿耿鑒此悃誠

祭青州郡伯劉葵宇年丈

於維我兄碩大有儀藜燈輝映經史陸離發爲
文章采旄桂旗匪茲壯氣孰建瑋詞孰是人耶

而止于斯兄昔奮揚射策軒墀風泉泱泱雲龍
駢駢乃奉黃紙出宰東圻置水明介拔薤伸威
爲隲方未報最及期至稱來暮去乃見思乃轉
劇邑爽鳩是居一麾出守五馬旁魄值歲大稜
寔展竒策拯彼遺黎集于中澤補劓息黔各有
攸託 帝嘉丕績璽書褒錫匪酬厥施求民之
莫秩滿亡何二豎爲疇溘爾騎箕神遊碧落金
刀掩鉞長淮絕涸賴有象賢將縻好爵慰兄在
茲食報不薄余等誼切墳笮彌嘆疎索聞笛淒

其驚鴻冥漠縮酒陳辭英魂可作嗚呼哀哉

祭宮庶馮源明親翁

嗚呼天監清朝適隆昭格保茲元良篤生儒碩
輔導旣宏師保在卽胡木倏顛胡山忽坼厥初
誕霸失怙銜恤畫荻九熊母貞克迪弱冠登壇
燕臺振翮藻榜聯標玉堂首陟挾藻絲綸抽圖
崑壁瀝血報劉 聖心隱惻棹楔特旌翟禴載
錫爰晉宮寮寔資孝德夙夜趨陪以引以翼
帝眷東朝詹庶用秩龍章洊加凝丞望亟名在

金甌宣麻旦夕造化不仁陽九違厄數載抱疴
覬聞起色屯蹇朋來貞慈下席哀毀逾常遂損
眠食含飴告痾鼓盆旋戚人生幾何百罹遞值
一厥長終籲天靡克豈不痛哉嗚呼公壽弗延
公德無斃三立備兼千秋赫奕子孝臣忠徽猷
永式身上星辰業垂金石分校南宮泰茅彙吉
全楚留都桃李遍植庭訓惟嚴青箱善述生榮
死哀慰茲窀穸貌余葭莩百年姻特婦天孫殞
禍延宗祐惠顧彌殷存亡匪易豈曰繫援仰止

且爽今茲已矣幽明頓隔子則在南含殮莫覲
輜車暫遷末由執紼興言涕零感深今昔陳詞
酌酒慨其傷盡靈如不忘鑒予肝膈

祭龍溪大令陳位宇年丈

嗚呼年兄胡溘以逝耶維兄以相金韞玉之質
抱鑄古鎔今之才歷選舉而上賢書陟南宮而
魁北闕可不謂試鑄鄒于初割騁驥足于脩塗
而豐其植者嗇其年名之成者祚之薄何也方
夫筮令邗邑軌未及停而椿室摧殘煢煢集蓼

迨夫復除龍溪席未暇煖而枵糲飲痛哀哀茹
荼居亡何而二豎爲祟五藥莫施矣嗚呼以間
關叱馭奔走王程焉而死是謂死官以哀毀立
骨銜恤靡至焉而死是謂死子死官死子均可
以死而冉耕不祿伯道無兒胡天不惠至此耶
余嘗爲君作南崖老人傳自老人下龐眉皓齒
五世一堂殆古稱廖氏世家甘谷壽里者何至
君之身而脩短相悖之戾也豈白石粼粼難出
貴人今者白石隱貴人出矣彼以不用終其天

年者此遂以通顯奪耶然則彼杖履而紆朱紫
者又何說也亡其君實有遺行耶或陰德未厭
于天心耶余屢過君于邸見其一食一息思不
忘親口若三緘行罔失尺寸度幾恂恂君子間
爲子息計別置一室比出京察其母子持戀遂
遣之歸任所適罄室中貲遺之卽此足以受遐
福履壽命而胡僅僅終也嗚呼當世已矣箕裘
無托誰則嗣之琴瑟在御誰則拊之之適之軒
青箱鄴架誰則承之總之達人委運脩短絕續

空齋文集卷之八
三
悉付倘然耳顧余忝屬同門情均手足旣弗克
素車白馬趨君道左而又弗能自附古人立後
之誼冥冥之中寔負良友惟是傷善施之罔報
嗟天道之靡論爰陳情于東帛聊寄慟于斯文
祭姚母馮太孺人

維母孝敬性成淑慎以則爲婦者範爲母者式
初事舅姑先意承志惠于太劉考終以逝推姑
遺愛撫及厥嫗喪嫗若姑煢煢荼茹佐讀劉薦
克相夫君表表黌校式畏成羣爰啟令子業富

縹緗士推冠冕世識珪璋令子篤孝母疾是憂
盤旋膝下罔敢遠遊予忝世誼猶母事之倖先
通籍爲子擇師遡厥家學莫汝行若請于母氏
母則許諾汝行含淚戀不忍舍勉以壯遊勿予
慮者挾策來京車未停轍倏聞訃音哀毀幾絕
臯魚之悲悲且至死余等抱首潛焉出涕因母
之訃數母之德敬姜是儔孟媪是匹植德彌厚
食報彌長子必雄飛孫且翱翔且泗且慰曰送
汝行炙鷄絮酒以酌厥靈母如不昧鑒此微虔

勿謂一滴罔及九泉

祭王母羅孺人

萬曆甲寅歲夏四月甲午日王親母羅太君仙逝時姻家翰林院修撰楊守勤已先期北發訃至武林舉家驚悼躊躇東望扶服弗能於是偕室人封安人嚴氏爲位旅舍哭焉蓋夫人于嚴爲母尊行于勤爲父執之元配且昔都丞公暨夫人並成家委禽之義不但爲區區女子之適郎君也夏五丁巳纜舟淮陰遣男一琦肅將香

帛牲醴之儀歸造几筵而告之其詞曰惟靈慧慈貞淑玉質蘭馨赫赫兩宗肅肅壺型緊昔夫人之誕名門也蟬聯世閥象翟詒英姆追周魯之教譽垂棣萼之榮其惟貴介之女士宜字華胄之琮璜暨夫人之歸我親翁也虔襄駿業敬助雞鳴貳州安德半刺錦城翼龔黃之播美邁張賈之行能輿誦載于青梁薦刻揚于帝庭其惟閩閩之令德克佐君子之芳名迨我親翁之考終也城烏候且寒空凜冰翩翩賢胤羽翮

寧濟齋全集卷之八
三
鷓鴣何以畀之青箱一經寧比三珠之爭光勛
勳何難五子之善繼休徵其惟慈範之素優豫
占哲嗣之有興總之親翁以學術而運量夫人
以勤儉而主衡治內治外義協施平王門母儀
吾室章程方音徽之奉違且雪涕而沾膺矧蒼
頭之疾止忽言告之吞聲厭彼塵世旋返玉京
天人往矣存順沒寧奈何尊行之歸盡而吾女
之失儀刑耶天蒼蒼兮水泓泓風蕭颯兮魂杳
冥凝神思兮海雲停魂其歸來兮鑿我悃誠

祭許母張太孺人

嗚呼碩人兮名姝之選毓粹嚮于勾吳兮羨內
德之獨全纓寶璐之陸離兮辨明月以爲環須
良士以結繡兮洵匹休于伯鸞嗣鷄鳴以尸倣
兮允賓儀之婉婉奉威章以樂康兮將魚菽以
竭懽執俎豆之苾芬兮殫夙夜而維艱相夫子
以騰驤兮跋天路之策鞭溥嘒星而逮下兮啟
芳胤之翩翩師旣遂乎鵲起兮乃司鐸于青壇
爾其甘簷花夜雨之蕭蕭兮怡苜蓿以供饘佐

清操以飈著兮當路嘉其玉潔而冰堅爰揭銅符以試劇兮兆必琴以鳴絃甫朞月而報可兮嚴筦鑰以維虔邇榮問之休壘兮歸闕職之其旋天將眷此脩姱兮賁翟茀之駢闐胡百六之忽覲兮遂一疾而棄捐士咸婁其悲切兮嗟婺賈兮珠沉淵猥余等之出自門墻兮荷培鑄于昔年瞻蕙帷之荒涼兮羗延佇而潺湲爰擷谿毛于甬之側兮挹泮水之涓涓望輜車而隰詞哀酹兮恍容與之連惓

祭外父繼蒙嚴先生


嗚呼痛哉岳父之逝也岳父為蒙齋太翁仲子髫年隨任弱冠承家豈不翩翩佳公子哉自遭兵燹之後家頗漸落而太翁日耽詩說禮不屑問生人產業伯既浮侈自任季尚幼未更事岳父獨朝夕拮据不避勞怨厥維艱矣比太翁捐館舍殯殮葬祭殫厥心力始與昆季析七箸時或效計然圖起家而逢時不淑遇輒相左家廼益落遂至棄去故業遷徙坎壈備極身嘗重以

反臂之累益以喪明之悲屯洳朋蹇其毒太苦
盖艱之艱矣乃今數年以來蔗境漸舒優游行
樂入則雙白相對子息承顏出則賓朋交驪杖
屨時集識者謂苦樂相乘困亨代禪此正怡養
天年之時也而胡爲一疾告祲二豎爲祟遂溘
焉長往矣豈不痛哉然岳父未嘗學問而事父
母惟謹歲時薦享必誠必潔因心篤愛曾不幾
微藏怒其孝友寔出天植未式古訓而志潔行
方貧有所不取議論務依名節非禮非法之地

未嘗妄一錯趾其介直若稟法程家徒壁立而
憫人之乏不啻由已軫人之急無異剝膚身甘
布素而弗慕軒冕弗羨豪華足已無求庶幾有
逸民之風此其性行醇樸寧不足以迂續脩齡
永介繁祉而胡僅僅以六十六終也天不可籲
人無如何痛矣痛矣憶自壬午之冬不肖勤始
獲事岳父時雖家已中葉猶支吾自給其所爲
愛若女及婿者真猶子慇切未幾而衰夷轉甚
不肖亦膠庠久伏鍛羽屢經棲遲抑鬱相憐相

寧澹齋全集卷之八
慰者凡若而歲幸今始得寸進意謂稱百年觴
以酬泰華恩者方有日焉而豈圖一旦成此永
別也其慘痛又可勝道哉雖然吾父長岳父十
年耳乃吾父先二年逝而不肖羈迹京塵疾不
及視湯藥歿不及視含殮子婦孫屬俱不及與
哭泣之位不孝之罪上通于天今岳父之逝也
子媳在前孫枝新茂若女若婿若甥無不環侍
以訣斯亦可謂備人世之完福而不孝所爲飲
恨于終天者益篤也又况子皆克家孫方未量
其所爲展業亢宗以光復太翁之遺緒者固自
有在岳父亦可長笑入地矣惟是痛幽明兮求
隔追形響兮無從瞻靈輻兮乍發嗟彼蒼兮不
庸潔牲醴兮泣酌庶來格兮雍容

寧澹齋全集卷之八終



原件短缺

卷九

...

...

...

...

...

...

...

...

...

...

...

...

...

...

...

...

...

...

...

律